

ושנת גאולי באה <sup>5</sup> ואביט ואין עוזר ואשתוממ ואין תומך ותושע לִיא זרועי וחמתִיא	1
היא סמכתני <sup>6</sup> ואבוסה עמים באפיא ואשכירסה בחמתי ואורידה לארצ נצחם	2
— <sup>7</sup> חסדי יהוה אזכיר תהלת יהוה כעל כול אשר גמלנו יהוה ורב טוב לבית ישראל	3
אשר גמאלם כרחמיו וכרוב חסדיו <sup>8</sup> ויואמ <sup>7</sup> אכ עמי המה בנים לוא ישקרו ויהי להמה	4
למושיע <sup>9</sup> בכול צרתמה לוא צר ומלאכ פניו הושיעמה באהבתיו ובחומלתיו הואה	5
גאלמה וינשאם וינטלם כול ימי עולם <sup>10</sup> והמה מרו ועצבו את רוח קודשיו ויהפך	6
להמה לאויב והואה נלחם במ <sup>11</sup> ויזכור ימי עולם מושה עמוא איה המעלה מים את רועי	7
צאִן־נו איה השמ בקרבו את רוח קודשו <sup>12</sup> ומוליך לימין מושה זרוע תפארתיו בוקע מים	8
מפניהמה לעשות שמ עולם <sup>13</sup> מוליכם בתומות כסוס במִי־בר לוא יכשלו <sup>14</sup> כבהמה בבקעה	9
תרד רוח יהוה תניחנו כיא נהגתה עמכה לעשות לכה שמ תפארת <sup>15</sup> הבט מן השמים	10
וראה מזבול קודשכה ותפאר־תכה איה קנאתכה וגבורתכה המון מעיך ורחמיכ אלי	11
התאפקו <sup>16</sup> כיא אתה אבינו ואברהם לוא ידענו וישראל לוא הכירנו אתה הואה	12
יהוה אבינו גואלנו מעולם שמכה <sup>17</sup> למה יהוה תתענו מדרכיכה תקשיח לבנו מיראתך	13
שוב למען עבדיך שבט נחלתך <sup>18</sup> למצער ירש עמ קודשך צרינו בססו מקדשכה <sup>19</sup> הוינו	14
מְעולם לוא משלתה במ לוא נקרא שמכה עליהמה לוא קרעתה שמים וירדתה מפניכה	15
הרים נזלו <sup>64:1</sup> כקדוח אש עמוסים מים תבעה אש לצריכה להודיע שמכה לצריכה־מפניכה	16
גואים ירגזו <sup>2</sup> בעשותכה נוראות נקוה ירדתה מפניכה הרים נזלו <sup>3</sup> מעולם לוא שמעו	17
ולוא האזינו ועי לוא ראתה אלוהים זולתך יעשה למחכה לו <sup>4</sup> פגעתה את שש ועושה	18
צדק בדרכיכה יזכורכה הנה אתה קצפתה ונחשא בהמה עולם ונושע <sup>5</sup> ונהיה כטמא	19
כולנו כבגד עדים כול צדקותינו ונבולה כעלה כולנו ועוונותינו כרוח ישאנו <sup>6</sup> ואין קורה	20
בשמכה מתעורר לאחזיק בכה כיא הסתרתה פניכה ממנו ותמגדנו ביד עווננו <sup>7</sup> ואתה	21
יהוה אבינו אתה ואנחנו חמר ואתה יוצרנו ומעשה ידיכה כולנו <sup>8</sup> אל תקצוף יהוה	22
עד מואדה ואל לעת תזכור עוו הנה הבטנה עמכה כולנו <sup>9</sup> ערי קודשכה היו מדבר	23
ציון כמדבר הייתה ירושלימ שוממה <sup>10</sup> בית קדשנו ותפארתנו אשר הללוכה אבותינו	24
היו לשרפת אש וכול מחמודינו היו לחורבה <sup>11</sup> העל אלה תתאפק יהוה תחשה ותעננו	25
עד מואדה <i>vacat</i>	26
<sup>65:1</sup> נדרשתי ללוא שאלוני נמציתי ללוא בקשוני אמרתי הנני אל גוי לוא קרא בשמיא	27
<sup>2</sup> פרשתי ידי כול היום אל עמ סורה ההולכים הדרך לוא טוב אחר מחשבותיהמה <sup>3</sup> העם	28
המכעיסים אותי על פני תמיד המה זובחים בגנות וינקו ידים על האבנים <sup>4</sup> היושבים	29